



Sámi allaskuvlla stivrra instruksa

Allaskuvlastivra dohkkehan stivrračoahkkimis 28.-29.9.2015

1. Instruksa ulbmil

Instruksa galgá addit dárkilat njuolggadusaid allaskuvlastivrra ovddasvástádusa ektui, čielggadit stivrrajođiheaddji doaimmaid allaskuvlastivrra ektui, ja bidjat njuolggadusaid allaskuvlastivrra doibmii ja áššemeannudeapmái nu ahte mearrádusat mat dahkkojuvvojit leat allaskuvlla buoremusat.

Stivrra instruksa adnojuvvo šiehtadussan gaskal guoskevaš stivrrajođiheddjiid, várrelahtuid ja allaskuvladirektevrra stivrra doaimmaid ja áššejođu ektui. Stivrra instruksa gusto dassá vejolaččat mearriduvvo ođđa ja rievdaduvvon stivreninstruksa, dat dahkko dábálaš eanetloguin stivrras.

2. Allaskuvlastivrra ovddasvástádus

Allaskuvlastivra lea allaskuvlla alimus orgána, ja allaskuvlla ovddasvástádusa láhkavuodđu lea Universitehta- ja allaskuvlalágas (Uhl), § 9 - 1:

(1) Stivra lea ásahusa alimus orgána. Das lea ovddasvástádus ahte ásahusa fágalaš dásis lea alla kvalitehta ja ahte jođihuvvo beaktilit ja gustojeaddji lágaid, láhkaásahusaid ja njuolggadusaid mielde, ja daid rámmaid ja mihtuid mielde maid bajit eiseválddit addet.

(2) Buot mearrádusat maid earát go stivra dahká ásahusas, dahkkojuvvojit váldesirdimiin stivrras ja stivrra ovddasvástádusain. Stivra sáhtta sirdit iežas mearridanválddi earáide ásahusas nu guhká go lágas ii čuočču ahte stivra ieš galgá váldit mearrádusa, dahje ahte leat eará erenoamáš ráddjejumit váldesirdima ektui.

Čuovvovaččat namuhuvvo "allaskuvlastivra" "stivran".

3. Stivrra doaimmat

Stivrra doaimmat čuvvot uhl. § 9-2 ja Máhtodepartemeantta váldoinstruksa ekonomiiijii ja hálddašeapmái. Stivrralahtut galget álelassii gozihit allaskuvlla beroštumiid.

4. Stivrra oktiibidjan ja mearridanváldi

Stivrras leat oktanuppelohkái lahtu ja das lea rektor, guhte lea stivrrajođiheaddjin, välljejuvvon prorektor stivrra nubbinjođiheaddjin, guokte lahtu välljejuvvon bargiid gaskkas oahpahuš- ja dutkanvirggis, okta lahtu välljejuvvon tehnikkalaš- hálddahušbargiid gaskkas, guokte lahtu välljejuvvon studeanttaid gaskkas, ja guokte olggobealde lahtu man Sámediggi lea nammadan ja guokte olggobealde lahtu man Máhtodepartemeantta lea nammadan.

Buot stivrralahtut välljejuvvojit 4 jahkái, earret studeanttat ja gaskaboddosaš bargit oahpahuš- ja dutkanvirgiin, guđet välljejuvvojit jahkái ain hávális, UH- lága §9-4 (2) (3) bokte.



Allaskuvladirektevra lea stivrra čálii, UH-lága § 10-3 (3) bokte.

Stivrras lea mearridanváldi go eanet go bealli miellahtuin leat sajis.

Stivrralahtut leat geatnegahtton boahit, nu guhká go ii lea lobálaš jávkan.

Jus ii sáhte boahit de galgá addit dieđu stivrračállái nu johtilit go vejolaš. Stivrračálii fuolaha ahte várrelahtut gohččojuvvojit. Olggobealde lahtuid ja studeantaid ovddas gohččojuvvojit persovnnalaš várrelahtut, bargiid várrelahtut gohččojuvvojit várrelahttolisttu mielde.

5. Permišuvdna, geassádeapmi ja nu ain

Stivrra lahttu geas lea permišuvdna, geassáda luohttámušdoaimmas permišuvdnaáigodagas. Várreláhttu doaibmá dalle bissovaš miellahtun. Boahdá ovdan Universitehta- ja allaskuvlalágas ja Sámi allaskuvlla válganjuolggadusain, goas ođđa- dahje lasihanválga galgá čađahuvvot.

6. Bealálašvuotta Hálddahušláhka (fvl), Kapihtal 2

Stivrralahtuin lea ovddasvástádus ieža árvvoštallat iežaset bealálašvuotta, ja eai sáhte leat mielde meannudit áššiid gos leat bealálaččat. Jus stivrra lahttu oaivvilda iežas leat bealálažžan, dahje jus lea eahpesihkkar bealálašvuotta ektui, de galgá son buktit jearaldaga stivrii mearriduvvot. Go stivra meannuda jearaldaga lahtu bealálašvuotta ektui, de galgá son geasa guoská guođđit čoahkkima.

Jus lahttu lea bealálaš, de son guođđá čoahkkima dan botta go ášši meannuduvvo. Várrelahttu gohččojuvvo jus dat lea praktihkalaččat vejolaš.

Stivrralahttu ii galgga leat mielde meannudit dahje váldit mearrádusa áššiin main lea earenoamáš mearkkašupmi alcces dahje eará lagašolbmui, ja go adnojuvvo ahte sus lea persovnnalaš dahje ekonomalaš erenoamášberoštupmi áššis, geahča muđuid fvl kapihtal 2. Seamma guoská allaskuvladirektevrii.

Allaskuvladirektevra ja rektor leaba bealálaččat go stivra meannuda sudno virgádaneavttuid.

7. Stivrralahtuid vuoigatvuođat ja geatnegasvuođat

Stivrralahtuin lea vuoigatvuohta ja geatnegasvuohta searvat šiehtadallamiidda ja jienastit. Ii leat vejolašvuohta jienastit guorus válgalihpui, earret válggaid oktavuodas. Go lea boađusovttalárganvuohta jienain eará áššiin go válggain, de lea čoahkkinjođiheaddji jietna mearrideaddji. Go lea boađusovttalárganvuohta jienain válggaid oktavuodas de mearriduvvo vuorbádemiin Uhl § 9 – 7 bokte.

Stivrralahtut ožžot čoahkkinbálkká ja gokčojuvvot mátkki biddjojuvvon njuolggadusaid mielde.



8. Jávohisvuodageasku gč. Hálddahuslága (fvl), § 13

Čoahkkin galgá leat giddejuvvon go meannuda áššiid maidda jávohisvuodageasku guoská. Áššebáhpárat galget sáddejuvvot ovttaskas stivrralahttui bábirin. Oskkáldas dieđut mat bohtet ovdan dahje referáhta siskkáldas digaštallamiin mat leat leamaš giddejuvvon uvssaid duohken eai galgga leavvat viidásat. Go rihkku jávohisvuodageasku mii lea lága bokte biddjon de sáhtá dat mielddisbuktít lágalaš reakšuvnnaid.

Áššebáhpárat main leat dieđut maidda jávohisvuodageasku guoská galget biddjot sierra máhppii ja čohkkejuvvot go čoahkkin loahpahuvvo. Lahtuin ii leat lohpi mánget dahje viidásat gaskkustit dákkár báhpáriid.

9. Stivrračoahkkimat – plána

Stivra mearrida čoahkkinplána boahhte oahppojahkáii manjmusat vuosttaš dábálaš čoahkkimis manjá geasseluomu. Nu guhkás go lea vejolaš de biddjo plána makkár áššit galget meannuduvvot biddjojuvvon áigemeeriid siste.

10. Gohččun ja áššebáhpárat

Rektor ja allaskuvladirektevra hábmeba ja sáddeba gohččuma ja áššelisttu ovttas. Rektor, allaskuvladirektevra dahje guokte lahtu stivrras sáhttet gáibidit ahte stivra gohččojuvvo čoahkkimii mii ii leat biddjon mearriduvvon čoahkkinplánii.

Áššebáhpárat galget, váldonjuolggadussan, sáddejuvvot manjmusat vahku ovdal čoahkkima. Liigedokumentašuvdna ja/dahje áššečilgehus sáhtá spiehkastahkan sáddejuvvot manjá, muhto lahtut fertejit leat ožžon dan manjmusat guokte beaivvi ovdal čoahkkima.

Stivrrajođiheaddji, ovttas allaskuvladirektevrrain, mearrida lea go ášši dakkár ahte dat ii galgga leat almmolašvuodas ja/dahje nu ahte dokumentašuvdna ii galgga sáddejuvvot ovttas gohččumiin ja ahte galgágo dokumentašuvdna dáid oktavuodain a) ovdanbuktojuvvot čoahkkimis dahje b) biddjot šiehttojuvvon áigái ja báikái olámuddui vai ovttaskas stivrralahtut sáhttet geahčadit daid.

Ovdal juohke stivrračoahkkima galgá dollot IDF čoahkkin váldoluohttámušolbmui (HT). HT galgá oazžut áššebáhpáriid (earret B-áššiid) oktanaga stivrralahtuiguin.



11. Stivrračoahkkimat

Stivra galgá meannudit áššiid čoahkkimis. Spiehkastahkan sáhttet stivrračoahkkimat dollojuvvot telefovndnačoahkkimin.

Galgá garvit hoahppoáššiid nu guhkás go vejolaš. Stivrralahtuin ferte goitge leat dáhttu meannudit áššiid mat bohtet oanehis áiggis ovdal čoahkkima, dahje čoahkkimis jus dát atno dohkálažžan. Stivra sáhtta mearridit hilgut meannudit áššiid mat buktojuvvojit njuolga stivrračoahkkimii ja mat dárbbasit dárkilat ráhkkaneami.

Áššiid maiguin ii sáhte vuordit boahhte dábálaš stivrračoahkkimii sáhttet buktojuvvot rektorii guhte váldá mearrádusa stivrra ovddas, jus ášši ii leat mearkkašahhti dahje jus eai leat lágalaš ráddjejumit. Mearrádusat maid rektor lea váldán ovdanbuktojuvvojit diehtun stivrii čuovvovaš stivrračoahkkimis.

Stivrračoahkkimat leat rabas čoahkkimat, jus stivra ii mearrit juoga eará. Áššit mat eai gula almmolašvuhtii galget meannuduvvot gitta čoahkkimis, UH-lága §9 mielde.

12. Čoahkkingirji

Stivrračoahkkimiin galgá čállot čoahkkingirji. Lea stivrra čálii guhte čállá čoahkkingirji. Čoahkkingirjái čállojuvvo goas ja gos stivra lea meannudan áššiid, geat ledje čoahkkimis, jus lei oktage guhte lei cealkán ahte ii boađe čoahkkimii, ja jus muhttin geassáda áššiid meannudeamis go lea bealálaš, ja stivrra mearrádus. Jus stivrra mearrádus ii leat ovttajienalaš, de galgá jienasteapmi boahtit ovdan čoahkkingirjii. Stivrralahttu sáhtta gáibidit ahte su oaivil čállojuvvo čoahkkingirjái. Berre čállojuvvot hui oanehaččat.

Čoahkkingirji galgá gárvejuvvot nu johtilit go vejolaš maŋŋá stivrrameannudeami, ja sáddejuvvot stivrii dohkkeheapmái. Ferte cuiggodit 6 beavvi siste jus leat mearkkašumit. Maŋŋá cuiggodanáigemeari de almmuhuvvo protokolla allaskuvlla neahttasiidui ja sáddejuvvo Máhttodepartementii, studeantastivrii ja riikkarevišuvdnii.

Čoahkkingirji sihke čállo sámegillii ja jorgaluvvo dárogillii.

13. Stivrra mearrádusaid čuovvuleapmi

Allaskuvladirektevrras lea ovddasvástádus čađahit ja álggahit stivrra mearrádusaid. Go bivdojuvvo de sáhtta allaskuvladirektevra ovdanbuktit mearrádusa čuovvoleami stivrii.

Stivra sáhtta álelassii gáibidit ahte allaskuvladirektevra addá stivrii dárkilat čilgehusa dihto áššiid birra. Dákkár čilgehusa sáhtta maiddá ovttaskas stivrralahttu gáibidit.

Stivra galgá juohke jagi álggus árvvoštallat allaskuvladirektevrra virgeinstruksa ja fuolahit ahte dat áimmahuššá ulbillaš ja jierpmálaš doaibmasisdoalu ovttasbarggu ja ovttasdoaibmama ektui stivrrain.



Stivra galgá árvvoštallat stivrra doaimma álo ovdal stivrenáigodat loahpahuvo.

15. Almmolašvuohta ja diehtujuohkin

Dokumeanttat maid allaskuvlastivra galgá meannudit dahkkojuvvojit almmolažžan seammás go sáddejuvvojit stivrralahtuide, jus allaskuvladirektevra ii leat mearridan ahte dokumeanttat eai galgga almmolašvuhtii.

Lea rektor, jus eará ii leat šihthtojuvvon erenoamážit gaskal rektora ja allaskuvladirektevrra, guhte addá dieđuid mediai stivrra áššemeannudeami ja -mearrádusaid birra - nu guhká go dat orro leamen dárbbášlaš.